



STINAPA TA INFORMA

BESTIANAN KU TA BULA

Aña 2010 ta nominá komo Aña Internashonal di e Diversidat Biológiko. Diversidat Biológiko ta e sòm di tur sorto di bestia i mata, genérico i eko sistemanan. Segun e plan di maneho di Naturalesa di Boneiru, tin 500 sorto di mata i 1050 sorto di bestia bibá riba Boneiru. Na e tipo di sifra aki semper mi ta puntra mi mes si tur e bestianan, ku mi ta mira den i rondó di mi kas, tambe ta kontá aden. Òf ta trata di solamente bestianan riparabel, ku bo por karisiá òf esnan skars manera flamingo, kinikini, gutu, mangel di awa i burikunan? Den e kantidat ei, lo a konta aserka e araña di kas ku kada bes di nobo ta traha un spenra den un huki isolá den mi sala? Tin un òf mas sorto di araña di kas? Nunka mi a realmente studia nan. Ami lo no sa si ta un, òf dos, òf tres sorto tin. Nan spenra ta ferflu pero na mes momentu e arañanan ei ta útil. E bestia chikitu ta fangu muskanan i sanguranan ku, apesar di e skrin den tur bentana, sa di dreña mi kas. En realidat, kiko nos sa di tur e bestianan ei? Tin di e muskanan chikitu ku ta bai riba lus i seguidamente ta kima nan mes riba e lampi eléktriko kayente. Si bo laga fruta para muchu tempu pafó di frishidèr, muskanan di fruta ta nase. I tur hende sa ku na Boneiru tin e lembelembe fastioso nan ei. En búskeda di humedat, nan ta preferá di sinta den skina di bo wowo òf riba bo lepnan. Parse ku nan ta famia di e muskanan di fruta. E wimpirinan, nan ta mas chikitu ainda, ta mas fastioso i nan ta morde mas fuerte. Kakunan buladó. I unabes ku awor nos ta papiando di e bestianan ku ta bula; esun mas molestioso pa mi ta e muskanan. Kuantu sorto di muska lo tin na Boneiru? En realidat, ki sentido e muskanan tin? Pakiko nan tei? Nan ta kuminda pa mi arañanan di kas, totèki òf pegapega. Den un anochi, ratonnan djanochi ta fangu sentenáres di nan. Sin muska, lo no tabatin raton djanochi? M'a yega di lesa den un artíkulo di STINAPA, ku ratonnan djanochi ta bastante útil. Nan ta libra nos di hopi muska i otro insektonan ku ta bula, i sin ratonnan djanochi, ménos yatu lo krese riba Boneiru. Nan ta 'inseminá' e flor di e yatu i di e forma aki yuda ku nan reprodukshon. I e frutanan di yatu, na nan turno, ta produsí kuminda pa loranan i prikichi. Mi ta kere ku tòg awor mi ta kuminsá komprondé algu mas di e palabranan difísil manera eko sistemanan i diversidat biológiko.

Skirbí pa V. van Barone

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru